

四庫全書

集部

欽定四庫全書

文章辨體彙選卷二十五

明 賀復徵 編

誥七 近體

參知政事歐陽修曾祖彬贈太子太保誥

宋王安石

勅君子善善之義下及子孫况推而上之至其祖考所以褒美崇寵豈顧可以不稱哉故先王宗廟之制視其爵位之高下以為世數之遠近而本朝追命之禮亦從

其子孫名數之卑尊具官某曾祖某潛於丘園躬有善行畜積之慶施於曾孫為時宗工名重天下圖任已登於右府褒嘉當及其前人東宮之孤位已顯矣進秩一品尚其享哉

曾祖母劉氏追封榮國太夫人誥

勅尊之欲其貴親之欲其富豈特人主有是心哉推是心以施於人此人主所以與天下同憂樂之意也祿有厚薄故禮有隆殺位有高下故施有遠近古之道也其

可忘哉具官某曾祖母某氏含德在躬作嬪令族積善之慶覃其後昆惟時聞孫實朕良弼登與政事人無間言其疏大邦之封以報流澤之施寵靈之極尚克享哉

祖某

勅朕惟有天下者得推其祖考上配於天蓋孝子慈孫所以極其尊崇之意推是心以及夫在位則其寵祿之厚者豈不欲以及其所謂尊親者哉此朕所以褒寵大

臣之先以尊爵貴官而有至于三世者也具官某祖某積德累善施於後嗣為子輔弼始大厥家東宮之孤既以命汝增榮一品尚克享哉

祖母某氏

勅朕疏郡縣以君諸臣之母欲以慰慈孫孝子之心至於政事之臣則封國及其王母所以望其功者厚矣則慰其心者顧可以薄哉具官某祖母某氏來嬪名家克配君子積善之福覃於其孫左右朕躬豫圖政事嘉而

有後錫以大邦維靈在幽尚克膺此

父某

勅大臣得爵命其先人至于公卿非古也然禮者人情而已矣當於人情而義足以勸士則何必古之有哉具官某父某蓄其德善不顯於世克生賢佐為朕股肱東宮一品人臣高位追以命汝用嘉有子尚其享此以稱饋祀之盛哉

母某氏

勅古者子為諸侯大夫而父為士則其祭以諸侯大夫之禮朕以謂得享其禮而位號不稱則不足以盡孝子之心故今有列於朝廷皆得追崇其考妣又況於為吾左右輔弼之臣哉具官某母某氏婦順母嚴稱於天下能教其子為時名臣協於詢謀進斷國論雖祿養不及而饋享有加啓封大邦於禮為稱尚其幽室知享此榮哉

總督宣大太子太保兵部尚書鄭洛并妻誥命

明

馮琦

制曰朕顧瞻雄鎮簡命重臣深惟今日之便宜頗異昔
時之經畧在昔申嚴郊保師中獨鎮王封於今兼覆要
荒漠外皆稱屬國寄屬滋重控制維艱爾具官某性篤
忠貞才兼文武爰從侍御夙高列栢之風踐歷臬藩茂
著采薇之烈秉節旄於西塞佐機畫於中樞全畀制閫
之權專聽籌邊之畧晉卿銜於夏省躋竣秩於春官蓋
委以事而責以功故加其官不易其鎮爾乃以恩威馭

敵以整暇治兵措三大鎮於衽席之安制兩名王於鞬
縶之末諸將皆遵其約束四夷盡懾其風稜召總禁旅
之屯以表師干之寵課書來奏贊冊宜頒是用授爾階
光祿大夫柱國錫之誥命於戲塞上十年揆勲勞之已
久軍中三命方恩數之惟新茲領王之爪牙寔象天之
壁壘折衝厭難朕未忘保障之功居重馭輕爾尚謹張
皇之訓祇服渥命益堅壯圖欽哉

制曰古稱將卒之旋必至室家之感草虫興思於北伐

鶴埴志慨於東征矧夫睽違間以存歿不有褒叙曷慰
幽潛爾累贈夫人陳氏乃具官某之妻柔嘉維則肅雍
其儀相夫既書績於旗常訓子亦宣勞於郎署采薇外
寧之治久藉同心奠繁中饋之賢已成異世特加贈爾
一品夫人式作玄扃之賁永垂彤管之聲

曾祖父母

制曰朕錫予勞臣褒寵先代如山川之出雲雨有開必
先念水木之有本原無德不報人稱榮邁國有上彛爾

原任浙江紹興府織染局大使贈通議大夫都察院右副都御史鄭臻乃其官某之曾祖父材資倜儻性植廉明蓋嘗為織室之官乃獨嚴繭絲之戒位雖不滿其德沒而有祀於鄉有仲象賢已拜中丞之命曾孫繼美重膺上袞之褒流澤彌長保世滋大特贈爾如孫官積百年而後興國恩未艾更四世而再命家乘乃昌

制曰勲庸著於絕塞於人臣為首功寵錫逮於曾聞於人世為異數庸頒休命以獎殊勲爾贈淑人張氏乃具

官某之曾祖母柔嘉淑慎宣慈惠和佐夫培瓜瓞之祥
迪子任節旄之寄惟我帥師之長子實爾繩武之曾孫
爰溯徽音特頒殊渥茲贈爾為一品夫人蒸畀並隆於
烈祖熾昌永光乎來昆

祖父母

制曰良士之垂世澤燕翼子以貽厥孫昭代之獎鉅僚
肇戎公而錫爾祉豈徒慰光前之志亦以昭裕後之休
爾累贈資政大夫兵部尚書兼都察院左副都御史鄭

隆乃具官某之祖父名高處士門應德星今世所謂古人間里稱為長者蓄其慶祉啓爾聞孫維翰維垣方舉報功之典是薦是莢可忘種德之勤茲加贈爾如孫官官保馳榮寵在羣僚之上祖孫濟美永垂奕世之休

制曰穹階極於一品而顯秩侈於重闈固國家報答之上彝亦大臣似續之弘孝爾累贈夫人葛氏乃具官某之祖母稟德靜專裋身孝敬釐爾士女夙培濬哲之祥裕乃後昆允協和鳴之吉鍾百年之餘慶開一代之偉

人勛庸既茂於公家尊寵宜歸於王母茲特加贈爾為
一品夫人並隆蒸畀之儀益保昌熾之祚

父母

制曰侂人維藩功已宣於固圉君子有穀教實始於趨
庭追叙前休庸申後命爾舉人累贈資政大夫兵部尚
書兼都察院左副都御史鄭昱乃具官某之父學窺道
岸名在賢書卞玉未酬尚鬱漸鴻之志韋金有託式弘
貽燕之謀眷予鎖鑰之臣實爾箕裘之緒溯其家法授

以國章茲特加贈爾如子官需綸音於三錫用伸未竟之歆登序位於六卿益衍無窮之問

制曰國家弘獎孤貞褒予勞勩念國所最重無如任事之臣推家所由興以有字孤之母可無恩寵以報劬勞爾累贈夫人劉氏乃具官某之母躬有令儀嬪於儒彥蚤罹未亡人之痛已嗟泛栢之難晚膺大司馬之封未竟樹萱之養即今三鎮節旄之寄皆由百年機杼之遺茲特加贈爾為一品夫人九原如在永昭彤史之輝三

錫為光丕闡玄扃之耀

南京戶部福建清吏司員外郎賀納賢并妻誥命

朱之俊

制曰度支郎司出納之衡綰軍民之命閭閻肥瘠國計
訕盈實於焉資其擘畫矧留都豐鎬邾鄆地匪藉廉智
忠毅者佐籌其間烏能公私兩足乎爾南京戶部福建
清吏司員外郎賀納賢天才英特斗望高華蚤驚一鶚
凌秋旋御雙鳬翔漢橫經馬帳壁池桃李成蹊露冕熊

與玉蠹桑麻迭浪爾其分猷版署展采農曹識炳燃犀
計則壤而鈎銖必析法嚴剔蠹窮射穴以數窟皆清霜
鏐莫喻其銛冰壺獨昭其潔膏餘赤子腹果健兒蘭省
含香憑金陵而借箸鳩司經賦指鍾阜以如坻茲以覃
恩授爾階奉直大夫錫之誥命間者南北通融留農亦
唏噓仰屋同舟自篤徹土宜殷畢慮康休精心斟酌於
爾實厚期焉成勞可嘉朕將有以顯陟爾也欽哉

制曰吏持籌贊計明析秋毫當亦思其室有問米鹽於

昔時者乎矧佐學佐官遺徽獨馥則勞薪為倍宜愍耳
爾南京戶部福建清吏司員外郎賀納賢之妻累贈宜
人周氏蘭蕙幽芬琬琰令質羞蘋脫珥敦重聞生死之
儀當夕問辰衍多男振繩之慶解紉怡然若素緝纊嗜
之如飴促杼鳴機黽勉贊三魁大業短衣椎髻淡寧襄
五緘高標象服中捐鸞絃永絕是用仍贈爾宜人霞氣
橫蜚彤管天波遙湛黃壚

父母

制曰士不必器之售而惟夫誼之修子不必身之枝而
惟其教之豫則操堅肥遯經啓貽謀脩然隱君子者報
功酬德愍綸豈有靳焉爾累贈奉直大夫賀承恩迺南
京戶部福建清吏司員外郎納賢之父慈諒溫恭直方
剛大萃聿獨含絕調岐嶷不類庸流力疾視安一息尚
存靡懈揮金周急千緡若脫非難介節如圭芳標擬玉
尊生而致孝日惟問業岐黃涉趣以怡真時自縱懷陶
阮義而行愛薦衮垂播獲之芳教以成恩圖史發簪紳

之耀莫親錡金徒泣弓裘是用仍贈爾為奉直大夫南
京戶部福建清吏司員外郎地署靈椿色黯天階宸簡
光流

制曰孝子於親慈我者亦戴之猶母矧懷之胞血甫瀝
之際背乎羽翮既健之秋成我者與生我者等蓼蕭隱
痛朕且愴然恤之爾累贈宜人胡氏迺南京戶部福建
清吏司員外郎賀納賢之母柔嘉自性貞靜得天誠竭
膾盤雙老克怡七箸淚濡鴻案百年丰理刀圭將雛恩

拜屬毛育駿誼圖主器禮隆師席解簪珥以為羞教啓
韋經忻苜宿而御金祿方川至婺已宵沈貞同汎栢彌
光碧灑存栢欲化是用仍贈爾為宜人從爵絲綸煥命
承恩松楸增輝

文章辨體彙選卷二十五

欽定四庫全書

文章辨體彙選卷二十六

明 賀復徵 編

策問一

徐師曾曰按古者選士詢事考言而已未有問之以策者也漢文中年始策賢良其後有司亦以策試士蓋欲觀其博古通今與夫剴劇解紛之職也然對策存乎士子而策問發於上人尤必善為疑難今取古

人策問分為二類曰制策試策云

漢文帝問賢良文學策

惟十有五年九月壬子皇帝曰昔者大禹勤求賢士施及方外四海之內舟車所至人跡所及靡不聞命以輔其不逮近者獻其明遠者通厥聰比善戮力以翼天子是以大禹能亡失德夏以長楸高皇帝親除大害去亂從治並建豪英以為官師為諫爭輔天子之闕以翼漢室也賴天之靈宗廟之福方內又安澤及四夷今朕獲執

天子之正以承宗廟之祀朕既不德又不敏明弗能燭而智不能治此大夫之所著聞也故詔有司諸侯王三公九卿及主郡吏各帥其志以選賢良明於國家之大體通於人事之終始及能直言極諫者各有人數將以匡朕之不逮二三大夫之行當此三道朕甚嘉之故登大夫於朝親諭朕志大夫其上三道之要及永惟朕之不德吏之不平政之不宣民之不寧四者之闕悉陳其志毋有所隱上以薦先帝之宗廟下以興愚民之休利

著之於篇朕親覽焉觀大夫所以佐朕至與不至書之
周之密之重之閉之興自朕躬大夫其正論毋枉執事
烏乎戒之二三大夫其帥志毋怠

武帝問賢良策五首

朕聞昔在唐虞畫象而民不犯日月所燭莫不率俾周
之成康刑錯不用德及鳥獸教通四時海外肅春北發
渠搜氏羌徠服星辰不孛日月不蝕山陵不崩川谷不
塞麟鳳在郊藪河洛出圖書鳴虡何施而臻此與今朕

獲奉宗廟夙興以求夜寐以思若涉淵水未知所濟猗
與偉與何行而可以章先帝之洪業休德上參堯舜下
配三王朕之不敏不能遠德此予大夫之所覩聞也賢
良明於古今王事之體受策察問咸以書對著之於篇
朕親覽焉

其二

朕獲承至尊休德傳之亡窮而施之罔極任大而守重
是以夙夜不皇康寧永惟萬事之統猶懼有闕故廣延

四方之豪雋郡國諸侯公選賢良修潔博習之士欲聞
大道之要至論之極今予大夫裒然為舉首朕甚嘉之
予大夫其精心致思朕垂聽而問焉蓋聞五帝三王之
道改制作樂而天下洽和百王同之當虞氏之樂莫盛
於韶於周莫盛於勺聖王已沒鐘鼓箎弦之聲未衰而
大道微缺陵夷至虐桀紂之行王道大壞矣夫五百年
之間守文之君當途之士欲則先王之法以戴翌其世
者甚衆然猶不能反日以仆滅至後王而後止豈其所

持操或諄謬而失其統與固天降命不可復反必推之於大衰而後息與烏虜凡所為屑屑夙興夜寐務法上古者又將無補與三代受命其符安在災異之變何緣而起性命之情或夭或壽或仁或鄙習聞其號未燭厥理伊欲風流而令行刑輕而奸改百姓和樂政事昭宣何修何飾而膏露降百穀登德潤四海澤臻草木三光全寒暑平受天之祐享鬼神之靈德澤洋溢施虜方外延及羣生子大夫明先聖之業習俗化之變終始之序

講聞高誼之日久矣其明以諭朕科別其條勿猥勿并
取之於術慎其所出迺其不正不直不忠不極枉于執
事書之不泄興於朕躬毋悼後害子大夫其盡心靡有
所隱朕將親覽焉

其三

蓋聞虞舜之時游於巖廊之上垂拱無為而天下太平
周文王至於日昃不暇食而宇內亦治夫帝王之道豈
不同條共貫與何逸勞之殊也蓋儉者不造玄黃旌旗

之飾及至周室設兩觀乘大路朱干玉戚八佾陳於庭而頌聲興夫帝王之道豈異指哉或曰良玉不琢又云非文亡以輔德二端異焉殷人執五刑以督姦傷肌膚以懲惡成康不式四十餘年天下不犯囹圄空虛秦國用之死者甚多刑者相望耗矣哀哉烏虜朕夙寤晨興惟前帝王之憲永思所以奉至尊章洪業皆在力本任賢今朕親耕藉田以為農先勸孝弟崇有德使者冠蓋相望問勤勞恤孤獨盡思竭神功烈休德未始云獲也

今陰陽錯繆氛氣充塞羣生寡遂黎民未濟廉恥貿亂
賢不肖渾淆未得其真故詳延特起之士意庶幾乎今
予大夫待詔百有餘人或道世務而未濟稽諸上古之
不同考之於今而難行毋乃牽於文繫而不得騁與將
所繇異術所聞殊方與各悉對著於篇毋諱有司明其
指畧切磋寃之以稱朕意

其四

蓋聞善言天者必有徵於人善言古者必有驗於今故

朕垂問乎天人之應上嘉唐虞下悼桀紂寢微寢滅寢
明寢昌之道虛心以聽今子大夫明於陰陽所以造化
習於先聖之道業然而文采未及豈惑乎當世之務哉
條貫靡竟統祀未終意朕之不明與聰若眩與夫三王
之教所祖不同而皆有失或謂久而不易者道也意豈
異哉子大夫既以著大道之極陳治亂之端矣其悉之
究之熟之復之詩不云乎嗟爾君子毋常安息神之聰
之介爾景福朕將親覽焉子大夫其茂明之

其五

蓋聞上古至治畫衣冠異章服而民不犯陰陽和五穀
登六畜蕃甘露降風雨時嘉禾興朱草生山不童澤不
涸麟鳳在郊數龜龍游於沼河洛出圖書父不喪子兄
不哭弟北發渠搜南撫交趾舟車所至人迹所及跂行
喑息咸得其宜朕甚嘉之今何道而臻乎此子大夫修
先聖之術明君臣之義講論洽聞有聲乎當世敢問子
大夫夫人之道何所本始吉凶之效安所期焉禹湯水

早厥咎何繇仁義禮智四者之宜當安設施屬統垂業
物鬼變化天命之符廢興何如天文地理人事之紀子
大夫習焉其悉意正議詳具其對著之於篇朕將親覽
焉靡有所隱

永明九年策秀才文五首

齊王融

問秀才高第明經朕聞神靈文思之君聰明聖德之后
體道而不居見善如不及是以崆峒有順風之請華封
致乘雲之拜或揚旌求士或設虞待賢用能敷化一時

餘烈千古朕夤奉天命恭惟永圖審聽高居載懷祇懼
雖言事必史而象闕未箴寤寐嘉猷延佇忠實子大夫
選名升學利用賓王懋陳三道之要以光四科之首鹽
梅之和屬有望焉

其二

又問昔周宣脩千畝之禮號公納諫漢文缺三推之義
賈生直言良以食惟民天農為政本金湯非粟而不守
水旱有待而無遷朕式照前經寶茲稼穡祥正而青旗

肅事土膏而朱紘戒典將使杏花菖葉耕獲不愆清劄
冷風述遵無廢而釋耒佩牛相沿莫反兼貧擅富浸以
為俗若爰井開制懼驚擾愚民漚鹵可腴恐時無史白
興廢之術矢陳厥謀

其三

又問議獄緩死大易深規敬法卹刑虞書茂典自氓俗
澆弛法令滋彰肺石少不寃之民棘林多夜哭之鬼朕
所以明發動容是食興慮傷秋荼之密網惻夏日之嚴

威永念畫冠緬追刑厝徒以百鍰輕科反行季葉四支
重罰爰創前古訪游禽於絕澗作霸秦基歌雞鳴於闕
下稱仁漢牘二途如爽即用兼通昌言所安朕將親覽

其四

又問聚人曰財次政曰貨泉流表其不匱貿遷通其有
無既龜貝積寢緡繼專用世代茲多銷漏參倍下貧無
兼辰之業中產闕游歲之貲惟瘠卹隱無捨矜歎上帝
溥臨賜朕休寶命卽斜之谷開而出銅且有後命事茲

鎔範充都內之金紹園府之職但赤仄深巧學之患榆莢難輕重之權開塞所宜悉心以對

其五

又問治厯明時昭遷革之運改憲勅法審刑德之原分命顯於唐官文條炳於鄒說及岨夷廢職昧谷虧方漢秉素祗之徵魏稱黃星之驗紛爭空軫疑論無歸朕獲纂洪基思弘至道庶令日月休徵風雨玉燭克明之旨弗遠欽若之義復還於子大夫何如哉其驪翰改色寅

丑殊建別白書之

永明十一年策秀才文五首

王融

問秀才朕秉籙御天握樞臨極五辰空撫九序未歌至
於思政明臺訪道宣室若墜之惻每勤如傷之念恒軫
故恤貧緩賦省徭慎獄幸四境無虞三秋式稔而多黍
多稌不興兩穗之謠無褐無衣必盈七月之歎豈布政
未優將罷民難業登爾於朝是屬宏議罔弗同心以匡
厥辟

其二

又問惟王建国惟典命官上叶星象下符川嶽必待天
爵具修人紀咸事然後沿才授職揆務分司是以五正
置於朱宣下民不忒九工開於皇序庶績其凝周官三
百漢位兼倍歷茲以降游惰寔繁若閒冗畢棄則橫議
無已冕笏不澄則坐談彌積何則可修善詳其對

其三

又問昔者賢牧分陝良守共治下邑必樹其風一鄉可

以為績至有旦撫鳴琴日置醇酒文而無害嚴而不殘
故能出人於阨危之域躋俗於仁壽之地是以賈誼有
言下之有惡吏之罪也頃深汰珪符妙簡銅墨而春雉
未馴秋螟不散入在朕前湊其智畧出連城守闕爾無
聞豈薪樵之道未弘為網羅之目尚簡悉意正辭無侵
執事

其四

又問朕聞上智利民不述於禮大賢彊國罔圖惟舊豈

非療飢不期於鼎食拯溺無待於規行是以三王異道而共昌五霸殊風而並烈今農戰不修文儒是競棄本徇末厥弊滋多昔宋臣以禮樂為殘賊漢主比文章於鄭衛豈欲非聖無法將以既道而權今欲專士女於耕桑習鄉閭以弓騎五都復而事庠序四民富而歸文學其道奚若爾無面從

其五

又問自晉氏不綱關河蕩析宋人失馭淮汴崩離朕思

念舊民永言攸躋故選將開邊勞來安集加以納款通
和布德修禮歌皇華而遣使賦膏雨而懷賓所以關洛
動南望之懷獫夷遽北歸之念夫危葉畏風驚禽易落
無待干戈聊用辭辯片言而求三輔一說而定五州斯
路何階人誰或可進謀誦志以沃朕心

天監三年策秀才文三首

梁任昉

問秀才朕長驅樊鄧直指商郊因藉時來乘此厯運當
辰永念猶懷慙德何者百王之收齊季斯甚衣冠禮樂

掃地無餘斷雕刊方經綸草昧採三王之禮冠履簞分
因六代之樂宮判始辨而百度草創倉廩未實若終畝
不稅則國用靡資百姓不足則惻隱深慮每時入芻藁
歲課田租愀然疚懷如憐赤子今欲使朕無滿堂之念
民有家給之饒漸登九年之蓄稍去關市之賦予大夫
當此三道利用賓王斯理何從佇聞良說

其二

問朕本自諸生弱齡有志閉戶自精開卷獨得九流七

略頗嘗觀覽六藝百家庶非牆面雖一日萬幾早朝晏
罷聽覽之暇三餘靡失上之化下草偃風從惟此虛寡
弗能動俗昔紫衣賤服猶化齊風長纓鄙好且變鄙俗
雖德慙往賢業優前事且夫搢紳道行祿利然也朕傾
心駿骨非懼真龍輜輶青紫如拾地芥而隋游廢業十
室而九鳴鳥蔑聞子衿不作弘獎之路斯既然矣猶其
寂寞應有良規

其三

問朕立諫鼓設謗木於茲三年矣比雖輻湊闕下多非
政要日伏青蒲罕能切直將齊季多諱風流遂往將謂
朕空然慕古虛受弗弘然自君臨萬寓介在民上何嘗
以一言失旨轉徙朔方睚眦有違論輸左校而使直臣
杜口忠讜路絕將恐弘長之道別有未周悉意以陳極
言無隱

唐德宗問賢良方正直言極諫策


陸贄

皇帝若曰蓋聞上古有道之君垂拱無為以臨四海不

理而人化不勞而事成星辰軌道風雨時若邈乎其不可繼何施而臻此歟三代以來制作滋廣異文質之變明利害之鄉威之以刑導之以禮敦其俗而彌薄防其人而益媮豈澆淳必繫於時耶將聖賢間生而莫之振也朕祇膺累聖之業猥居兆人之上虔恭刻勵如恐墜失憂濟庶務夕惕晨興永惟前王之典謨是憲是則師大禹以崇儉法高宗以求賢興夏啓之征作周文之伐旌孝弟舉直言養高年敦本業平均徭稅黜陟幽明勵

精孜孜勤亦至矣然而浮靡不革理化不行暴亂不懲
奸犯不息五教猶鬱七臣未臻鄉黨廢尚齒之儀蒸黎
無安土之志賦入日減而私室愈貧廉察日臻而吏道
愈濫意者朕不明歟勢不可歟何古今之事同而得失
之效異也思欲剴革前弊創立新規施之於事而易從
考之於文而有據備陳本末將舉而行棄或憚煩畧於
條對自頃陰陽舛候浸沴荐興仍歲旱蝗稼穡不稔上
天作孽必有由然屢推凶災其咎安在傳曰時之不乂

厥罰恒暘又曰堯湯水旱數之常也二者相反其誰云
從今人靡蓋藏國無廩積朕屢延卿士詢訪謀猷至乃
減冗食之徒罷不急之務既聞嘉話亦已遵行而停廢
之餘所費尚廣欲轉輸於江徼則遠不及期將搜粟於
關中則擾而無獲節軍食則功臣懷怨省吏員則多士
靡歸中心浩然罔知攸濟予大夫蘊畜財器通明古今
副我虛求森然就列匡朕之寡昧拯時之艱災畢志直
言毋有所隱



文章辨體彙選卷二十六

欽定四庫全書

集部

文章辨體彙選卷二十七至
三十九

詳校官中書_臣金應琦

主事銜_臣徐以坤覆勘

總校官檢討_臣何思鈞

校對官編修_臣勵守謙

謄錄監生_臣任嘉春

欽定四庫全書

文章辨體彙選卷二十七

明 賀復徵 編

策問二

問進士策

唐元結

問開元天寶之中耕者益力四海之內高山絕壑耒耜
亦滿人家糧儲皆及數歲太倉委積陳腐不可校量忽
遇凶年穀猶耗盡當今三河膏壤淮泗沃野皆荆棘已

老則耕可知太倉空虛雀鼠猶餓至於百姓朝暮不足而諸道聚兵百有餘萬遭歲不稔將何為謀今欲勸人耕種則喪亡之後人自貧苦寒餒不救豈有生資今欲罷兵息戍則又寇盜猶在尚須防遏使國家用何策得人安俗阜不戰無兵用何謀使縱遇凶年亦無災患

其二

問古人識貴精通學重兼博不有激發何以相求三禮何篇可刪三傳何者可廢墨氏非樂其禮何以儒家委

命此言當乎彼天女天孫不知何物彼日兄月姊弟妹
是誰駟僮與僮奴寧分一純將二精何說孤竹之君何
姓新城老婦何名棘竹出自何方毒銅產於何國何鄉
無水可飲何池卧冰而溫何人恩信過於田橫何人壯
勇等於關侯何人鑿坯而遁何人終日掃門無淺近之
不為悉說

問為治策

宋歐陽修

問古者為治有繁簡其施於民也有淺深各適其宜而

已三代之盛時地方萬里而王所自治者千里而已其餘以建諸侯至於禮樂刑政頒其大法而使守之則其大體蓋簡如此諸侯大小國蓋數千必各立都邑建宗廟卿士大夫朝聘祭祀訓農練卒居民度土自一夫以上皆有法制則其於衆務何其繁也今自京師至於海隅徼障一尉卒之職必命於朝政之大小皆自朝出州縣之吏奉行而已是舉天下皆所自治其於大體則為繁矣其州縣大小閭邑田井訓農練卒一夫以上畧亡

制度其於衆務何其忽而簡也夫禮以治民而樂以和之德義仁恩長養涵澤此三代之所以深於民者也政以一民刑以防之此其淺者爾今自宰相至於州縣有司莫不行文書治吏事其急在督賦歛斷獄訟而已此特淺者爾禮樂仁義吏不知所以為而欲望民之被其教其可得乎夫治大以簡則力有餘治小以繁則事不遺制民以淺則防其僻漸民以深則化可成此三代之所以治也今一切恃古簡其當繁而繁其可簡務其淺

而忽其深故為國百年而仁政未成生民未厚者以此也然若欲使國體大小適煩簡之宜法政弛張盡淺深之術諸侯井田不可卒復施於今者何宜禮樂刑政不可卒成用於今者何便悖古之失其原何自修復之方其術何始迹治亂通古今予大夫之職也其悉心以陳焉

問周禮官制之疑

歐陽修

問六經者先王之治具而後世之取法也書載上古春

秋紀事詩以微言感刺易隱而深矣其切於世者禮與樂也自秦之焚書六經盡矣至漢而出者皆其殘脫顛倒或傳之老師昏耄之說或取之冢墓屋壁之間是以學者不明異說紛起况乎周禮其出最後然其為書備矣具天地萬物之統制禮作樂建國君民養生事死禁非道善所以為治之法皆有條理三代之政美矣而周之治迹所以比二代而尤詳見於後世者周禮著之故也然漢武以為瀆亂不驗之書何休亦云六國陰謀之

說何也然今考之寔有可疑者夫內設公卿大夫下至府史胥徒以相副貳外分九服建五等差尊卑以相統理此周禮之大畧也而六官之屬畧見於經者五萬餘人而里閭縣鄙之長軍師卒伍之徒不與焉王畿千里之地為田幾井容民幾家王官王族之國邑幾數民之貢賦幾何而又容五萬人者於其間其人耕而賦乎如其不耕而賦則何以給之夫為治者固若是之煩乎此其一可疑者也秦既誅古盡去古制自漢以後帝王稱

號官府制度皆襲秦故以至於今雖有因有革然大抵皆秦制也未嘗有意於周禮者豈其體大而難行乎其果不可行乎夫立法垂制將以遺後也使難行而萬世莫能行與不可行等爾然則反秦制之不若也脫有行者亦莫能興或因以取亂王莽後周是也則其不可用決矣此又可疑也然其祭祀衣服車旗似有可采者豈所謂郁郁之文乎三代之治其要何如周禮之經其失安在宜於今者其禮安從其悉陳無隱

問為政歐陽修

問為政者徇名乎襲迹乎三代之名正名也其迹治迹也所謂名者萬世之法也迹者萬世之制也正名立制言順事成然後因名迹以考實而其文章事物粲然無不備矣可謂盛哉董仲舒以為三代質文有改制之名而無變道之實者是也自秦肆其虐滅棄古典然後三代之名與迹皆變易而喪其實豈所謂變其道者耶然自秦迄今十有餘歲或治或亂其廢興長短之執各由

其人為之而已其襲秦之名不可改也三代之迹不可復也豈其理之自然歟豈三代之制止於三代而不可施於後世歟王莽求其迹而復井田宇文求其名而復六官二者固昏亂敗亡之國也然則孔子言為政必也正名孟子言為政必始經界豈虛言哉然自秦以來治世之主幾乎三代者唐太宗而已其名迹固未嘗復三代之一二而其治則幾乎三王豈所謂名迹者非此之謂歟豈遺名與迹而直考其實歟豈孔孟之所謂者有

旨而學者弗深考之歟其酌古今之宜與其異同者以對

問漢之禍凡六變

蘇軾

問人主莫不欲安存而惡危亡然而其國常至於不可救者何也所憂者非其所以亂與亡而其所以亂與亡者常出於其所不憂也請借漢以言之昔者高帝之世天下既平矣當時之所憂者韓彭英盧而已此四王者皆不能終高帝之世相繼仆滅而不復續及至呂氏之

禍則由異姓也呂氏既已滅矣而吳楚之憂幾至於亡國方韓彭呂氏之禍惟恐同姓之不蕃熾昌大也然至其為變則又過於異姓遠矣文景之世以為諸侯分裂破弱則漢可以百世而無憂至於武帝諸侯之難少衰而匈奴之患方熾則又以為天下之憂止於此矣及昭宣元成之世諸侯王既已無足憂者而匈奴又破滅臣事於漢然其所以卒至於中絕而不救則其所不慮之王氏也世祖既立上懲韓彭之難中鑒七國之變而下

悼王氏之禍於是盡侯諸將而不任以事裁減同姓之封而黜三公之權以為前世之弊盡去矣及其衰也宦官之權盛而黨錮之難起士大夫相與搯腕而遊談者以為天子一日誅宦官而解黨錮則天下猶可以無事於是外召諸將而內脅其君宦官既誅無遺類而董卓曹操之徒亦因以亡漢漢之所憂者凡六變而其亂與亡輒出於其所不憂而終不可備由此觀之治亂存亡之勢其皆有以取之與抑將不可推如江河之徙移其

勢自有以相激而不自知與其亦可以理推力救而莫之為也今將使事至而應之患至而為之謀則天下之患不可以勝防而教化不可以勝變矣則亦將朝文而暮質忽寬而驟猛歟意者亦可以長守而不變雖有小患而不足卹者歟願因論漢而極言其所以然

問用人 蘇軾

問昔三代之際公卿有生而為之者士有至老而不遷者官有常人而人有常心故為周之公卿者非周召毛

原則王之子弟也發於畎畝起於匹夫而至於公相則蓋亦有幾人而已士之勤苦終身於學講肄道藝而修其廉隅以邀鄉里之名不過以望卿大夫賢能之書其選舉而上不過以為一命之士其傑異者至於大夫極矣夫周之世諸侯為政之卿皆其世臣之子孫則夫布衣之士其進蓋亦有所止也當是之時士皆安其習而樂其分不倦於小官而樂為之故其民事修而世務舉及其後世不然使天下旅進而更為之雖布衣之賢得

以驟進於朝廷而士始有無厭之心矣官事之不修民
事之不緝非其不能不屑為之也先王之用人欲其人
人自喜終老而不倦是以能盡其才今以凡人之才而
又加之以既倦之意其為弊可勝言乎今夫州縣之吏
有故而不得改官者盤桓而不能去久者不過以為職
官今祿仕而達者自縣宰為郡之通守自郡之通守以
至郡守為郡守而無他才能則盤桓於太守而不得去
由此觀之是職官令錄與郡守四者為國家棄材之委

而仕不達者之所盤桓而無聊也夫以太守之重職官
令錄之近於民而用棄材焉使不達者盤桓於其職此
豈先王所以使人不倦之意歟嗟夫蓋亦有不得已也
居今之勢何以使天下之士各安其分而無輕於小官
何以使此四者流徙不倦而無不自聊賴之意其悉書
於篇

問得人
蘇軾

問易曰神而明之存乎其人詩曰無競惟人四方其訓

之文武之功未有不以得人而成者也仲尼旅人也而
門人可使南面重耳亡公子也而從者足以相國漢之
得人盛於武宣皆拔之芻牧之中而表之公卿之上世
主不以為疑士大夫不以為嫌者風俗厚而論議正也
宋蔡廓為吏部尚書黃散以下皆得自用而廓以為薄
已今自宰相不得專選舉一命以上皆付之定法此何
道也昔常袞當國雖盡公守法而賢愚同滯天下譏之
及崔貽孫相不及一年除吏八百多其親舊號稱得人

故建中之政幾同貞觀夫使宰相守法如常袞則不免於賢愚同滯之譏用人如貽孫則必有威福下移之謗欲望得人於微陋之中而成功於繩墨之外豈不難哉予大夫學優而求用者也當何施於今而免於斯二者願極言之

問堯舉鯀治水之疑

王安石

問堯舉鯀於書詳矣堯知其不可然且試之邪抑不知之也不知非所以為聖也知其不可然且試之則九載

之民其為病也亦久矣幸而羣臣遂舉舜禹不幸復稱
鯀此亦將以九載試之邪以堯之大聖知鯀之大惡其
知之也足以自信不疑矣何牽於羣臣也必曰吾惟羣
臣之聽不自任也聖人之心急於救民其趨舍顧是否
何如豈固然邪必以為後世法得無明哲之主牽制以
召敗者邪或曰堯知水之數故先之以鯀或曰久民病
以大禹功是皆不然堯必不以民病私禹禹不必以利
民病而大已功以民病私其臣利民病以為已功烏在

其為堯禹也又以為泥於數其探聖人滋淺矣且謂之
有數蘇何罪其殛死也聖人之所以然愚不能釋吾子
無隱焉耳

文章辨體彙選卷二十七

欽定四庫全書

文章辨體彙選卷二十八

明 賀復徵 編

九錫文

復徵曰按說文錫與也賜也易云王三錫命開國承
家人臣至冊以九錫此乃姦雄篡竊所由始而非國
家之利矣然其文必典雅閎肆極其鋪張錄之以存
一體

漢愍帝冊魏公九錫文

潘勗

制詔使持節丞相領冀州牧武平侯朕以不德少遭閔
凶越在西土遷於唐衛當此之時若綴旒然宗廟乏祀
社稷無位羣凶覬覦連帶城邑一人尺土朕無獲焉即
我高祖之命將墜於地朕用夙興假寐震悼於厥心曰
惟祖惟父股肱先正其孰恤朕躬乃誘天衷誕育丞相
保乂我皇家弘濟於艱難朕實賴之今將授君典禮其
敬聽朕命昔者董卓初興國難羣后釋位以謀王室君

則攝進首啓戎行此君之忠於本朝也後及黃巾反易
天常侵我三州延於平民君又討之翦除其跡以寧東
夏此又君之功也韓暹楊奉專用威命又賴君勲克黜
其難遂建許都造其京畿設官兆祀不失舊物天地鬼
神於是獲乂此又君之功也袁術僭逆肆於淮南懾憚
君靈用丕顯謀蘄陽之役橋蕤授首稜威南厲術以殞
潰此又君之功也迴戈東指呂布就戮乘軒將反張揚
沮斃眭固伏罪張繡稽伏此又君之功也袁紹逆常謀

危社稷憑恃其衆稱兵內侮當此之時王師寡弱天下
寒心莫有固志君執大節精貫白日奮其武怒運諸神
策致局官渡大殲醜類俾我國家拯於危墜此又君之
功也濟師洪河拓定四州袁譚高幹咸梟其首海盜奔
迸黑山順軌此又君之功也烏丸三種崇亂二世袁尚
因之逼據塞北東馬懸車一征而滅此又君之功也劉
表背誕不供貢職王師首路威風先逝百城八郡交臂
屈膝此又君之功也馬超成宜同惡相濟濱據河潼求

逞所欲殄之渭南獻馘萬計遂定邊城撫和戎狄此又君之功也鮮卑丁令重譯而至單于白屈請吏帥職此又君之功也君有定天下之功重以明德班叙海內宣美風俗旁施勤教恤慎刑獄吏無苛政民不回慝敦崇帝族援繼絕世舊德前功罔不咸秩雖伊尹格于皇天周公光於四海方之蔑如也朕聞先世並建明德昨之以土分之以民崇其寵章脩其禮物所以蕃衛王室左右厥世也其在周成管蔡不靖懲難念功乃使邵康公

錫齊大公履東至於海西至於河南至於穆陵北至於
無棣五侯九伯實得征之世祚太師以表東海爰及襄
王亦有楚人不供王職又命晉文登為侯伯錫以二輅
虎賁鈇鉞鉅鬯弓矢大啓南陽世作盟主故周室之不
壞繫二國是賴今君稱丕顯德明保朕躬奉答天命導
揚弘烈綏爰九域罔不率俾功高乎伊周而賞卑乎齊
晉朕甚慙焉朕以眇身託於兆民之上永思厥艱若涉
澗水非君攸濟朕無任焉今以冀州之河南河內魏郡

趙國中山鉅鹿常山安平甘陵平原凡十郡封君為魏
公使使持節御史大夫慮授君印綬冊書金虎符第一
至第五竹使符第一至第十錫君玄土苴以白茅爰契
余龜用建冢社昔在周室畢公毛公入為卿佐周邵師
保出為二伯外內之任君實宜之其以丞相領冀州牧
如故今更下傳璽肅將朕命以允華夏其上故傳武平
侯印綬今又加君九錫其敬聽後命以君經緯禮律為
民軌儀使安職業無或遷志是用錫君大輅戎輅各一

玄牡二駟君勸分務本嗇民昏作粟帛滯積大業惟興
是用錫君袞冕之服赤舄副焉君敦尚謙讓俾民興行
少長有禮上下咸和是用錫君軒懸之樂八佾之舞君
翼宣風化爰發四方遠人回面華夏充實是用錫君朱
戶以居君研其明哲思帝所難官人任賢羣善必舉是
用錫君納陛以登君秉國之均正色處中臧毫之惡靡
不抑退是用錫君虎賁之士三百人君糾虔天刑章厥
有罪犯關干紀莫不誅殛是用錫君鈇鉞各一君龍驤

虎視旁眺八維掩討逆節折衝四海是用錫君彤弓一
彤矢百旅弓十旅矢十君以溫恭為基孝友為德明允
篤誠感孚朕思是用錫君拒匄一卣珪瓚副焉魏國置
丞相以下羣卿百僚皆如漢初諸王之制君往欽哉敬
服朕命簡恤爾衆時亮庶功用終爾顯德對揚我高祖
之休命

文章辨體彙選卷二十八

欽定四庫全書

文章辨體彙選卷二十九

明 賀復徵 編

鐵券文

徐師曾曰按字書云券約也契也劉熙云縑也相約束縑縑以為限也史稱漢高帝定天下大封功臣剖符作誓丹書鐵券金匱石室藏之宗廟後世因此遂有鐵券文焉

漢高帝封功臣鐵券誓詞

漢高帝定天下大封功臣剖符作誓丹書鐵券金匱石室藏之宗廟其誓詞曰

使河如帶泰山若礪國以永存爰及苗裔

唐德宗賜安西管内黃姓纛官鐵券文

維貞元二年歲次丙寅八月丁巳朔三日己未皇帝若曰咨爾四鎮節度管内黃姓纛官驃騎大將軍行左金吾衛大將軍員外置同正員兼試太常卿頓吸獲波支

維爾乃祖乃父代服聲教勤勞王家勲書於鼎彝族列
於藩籍爾克紹先祖之烈而重之以忠貞嗣守職官祇
若朝化率其種落保我邊陲丹誠向化萬里如近是用
稽諸令典錫以券書若金之堅永代無變子孫繼襲作
我藩臣爾其欽承勿替休命

僖宗賜陳敬瑄太尉鐵券文

維中和三年皇帝賜功臣陳敬瑄鐵券曰烹巨鼈者鼎
大於滄海斬長鯨者劒倚於青天既立異勲勉膺殊寵

李晟免其十死子儀成其九功鏤以金鏤錫其鐵券後
來繼者豈在他人歲寒知松栢之心國難見忠貞之節
五山鎮地一柱擎天氣壓乾坤量今宇宙自居環衛出
擁旌幢論清政而水鏡無光吐赤誠而朝霞失色手持
玉節身鎮錦城扶乾綱則萬國安心組坤維則百變遶
指三川飲化一境歸仁朕以稅駕褰斜省方邛屬蜀邐
而來迎鳳輦驅馳而速建龍宮百辟來朝萬方入貢夏
禹塗山之會未盛於斯漢高沛國之歡無以過此戮阡

能疾如剪草除秀昇易若焚巢不讓武侯之勛無愧文
翁之化海東獻欸雲南披誠九穀豐登三農務盛濟贍
軍國拯接朝廷內竭家財外罄公帑千官感惠一國推
功今則巨猾奔逃神州克復將歸上國即別成都致朕
身安由卿忠藎前封公爵後賜郡王詢於衆情未愜羣
望今賜卿鐵券赦其十死望泰山而立誓指黃河以為
盟山無盡時河無竭日君君臣臣父父子子永遠貴昌
並皆如此

文章辨體彙選卷二十九

欽定四庫全書

文章辨體彙選卷三十

明 賀復徵 編

赦文

德音文附

徐師曾曰按字書云赦者舍也肆赦之語始見虞書而周禮司刺掌三赦之法呂刑有疑赦之制則或以其情之可矜或以其事之可疑或以其人在三赦三宥八議之列是以赦之非不問其情之淺深罪之輕

重而槩赦之也後世乃有大赦之法於是為文以告
四方而赦文興焉又謂之德音蓋以赦為天子布德
之音也然考之唐時戒厲風俗亦稱德音則德音之
與赦文自是兩事不當強而合之也今各仍其稱以
附赦文之後

唐玄宗至都大赦天下制文

蘇頌

黃門周宅中土秦里上田皆王者之都也時邁觀風載
巡展義皆王者之政也朕嗣守宸極頗移年所晁旒而

視心每周於萬邦車轍所屆迹不出於三輔豈懷安於
憚勞姑省費而休力然以設京師者不偏於西據奉宗
廟者亦候於東征安可阻從人之心增僉予之怨是用
閭陽發歲練日簡辰乘和氣以應物御惠風以行令永
言告至載叶佻來顧茲菲躬畏此鴻業下輦而有宮室
即舊不加登臺而有山川覽今猶昔森然在目用軫於
懷思弘遠圖俾作寬典不忘師古之義特布惟新之渥
可大赦天下自開元五年二月三日昧爽已前大辟罪

已下罪無輕重已發覺未發覺已結正未結正繫囚見
徒常赦所不原者咸赦除之唯謀反大逆不在赦限

云

云夫政欲清淨詞尚省要間者思致於久未臻其道文

書盈几閣而吏益欺詔命下閭里而人莫諭得非失於
牴牾弊於煩蕪耶簡而易從禁則難犯今式格勅有不
便者先令尚書省集議判定宜詳厥衷合於大體亡命
山澤挾藏軍器百日不首復罪如初敢以赦前事相告
言者以其罪罪之赦書日行五百里布告天下知朕之

意焉主者施行

德宗神武皇帝奉天改元大赦文

陸贄

門下致理興化必在推誠忘已濟人不恡改過朕嗣服
丕構君臨萬邦失守宗祧越在草莽丕念率德誠莫追
於既往永言思咎期有補於將來明徵厥初以示天下
惟我烈祖邁德庇人致俗化於和平拯生靈於塗炭重
熙積慶垂二百年伊邇卿尹庶官洎億兆之衆代受亭
育以迄乎今功存於人澤垂於後肆予小子獲纘洪業

懼德不嗣罔敢怠荒然以長於深宮之中暗於經國之
務積習易溺居安忘危不知稼穡之艱難不卹征戍之
勞苦澤靡下究情不上通事既壅隔人懷疑阻猶昧省
已遂致興戎徵師四方轉餉千里賦車籍馬遠近騷然
行齋居送衆庶勞止或一日屢交鋒或連年不解甲
胄祝奠乏主室家靡依生死流離怨氣凝結力役不息
田萊多荒暴命峻於誅求疲眊空於杼軸轉死溝壑離
去鄉閭邑里丘墟人煙斷絕天譴於上而朕不寤人愁

於下而朕不知馴致亂階變興都邑賊臣乘釁肆逆滔
天曾莫愧畏敢行凌逼萬品失序九廟震驚上辱於祖
宗下負於黎庶痛心覷貌罪實在余永言愧悚若墜淵
谷賴夫天地降祐人神叶謀將相竭誠爪牙宣力屏除
大盜載張皇維將弘永圖必希新命朕晨興夕惕唯念
前非乃者公卿百寮累抗章疏擬以徽號加於朕躬固
辭不獲俯遂輿論昨因內省良用矍然體陰陽不測之
謂神與天地合德之謂聖顧惟淺昧非所宜當文者所

以化成武者所以定亂今化之不被亂是用興豈可更
徇羣情苟膺虛美重予不德祇益懷慙自今已後中外
所上書奏不得更稱聖神文武之號夫人情不常繫於
時化大道既隱亂獄滋豐朕既不能弘德導人又不能
一法齊衆苟設密網以罪非辜為之父母實增愧悼今
上元統歷獻歲發生宜革紀年之號式敷在宥之澤與
人更始用答天休可大赦天下改建中五年為興元元
年自正月一日昧爽已前大辟罪已下罪無輕重咸赦

除之李希烈田悅王武俊李納等有以忠勞任膺將相
有以勲舊繼守藩維朕撫馭乖方信誠靡著致令疑懼
不自保安兵興累年海內搔擾皆曰上失其道而下罹其
災朕實不君人則何罪屈已弘物予何愛焉庶懷引慝
之誠以洽好生之德其李希烈田悅王武俊李納及所
管將士官吏等一切並與洗滌各復爵位待之如初仍
即遣使分道宣諭未滔雖與賊泚連坐路遠未必同謀
朕方推至誠務欲弘貸如能效順亦與維新其河南河

北諸軍兵馬並宜各於本道自固封疆勿相侵軼朱泚大為不道棄義蔑恩反易天常盜竊名器暴犯陵寢所不忍言獲罪祖宗朕不敢赦其被朱泚脇從將士官吏百姓及諸色人等有遭其扇誘有迫以凶威苟能自新理可矜宥但官軍未到京城已前能去逆效順及散歸本軍本道者並從赦例原免一切不問天下左降官即與量移近處已量移者更與量移流入配隸及罰鎮効力並緣罪犯與諸使驅使官兼別勅諸州縣安置及得罪人家口未許歸者一

切放還先有痕累禁錮及反逆緣坐承前恩赦所不該者並
宜洗雪亡官失爵放歸勿齒者量加收除未復資者更與進
叙人之行業或未必兼構大厦者方集於羣材建奇功者不
限於常檢苟在適用則無棄人况黜免之人沈鬱既久朝過
夕改仁何遠哉流移降黜亡官失爵配隸流人等有才能著
聞者特加錄用勿拘常例諸軍諸使諸道赴奉天及進收京
城將士等或百戰摧敵或萬里勤王扞固全城驅除大憝濟
危難者其節著復社稷者其業崇我圖爾功特加彛典錫名

疇賦永永無窮宜並賜名奉天定難功臣身有過犯遞減罪三等子孫有過犯遞減罪二等當戶應有差科使役一切蠲免其功臣已後雖衰老疾患不任軍旅當分糧賜並宜全結身死之後十年內仍回給家口具有食寶封者子孫相繼代代無絕其餘叙錄及功賞條件待收京日並准去年十月十七日十一月十四日勅處分諸道諸軍將士等久勤扞禦累著功勲方鎮克寧惟爾之力其在行營者並超三資與官仍賜勲五轉不離鎮者依資與官賜勲三轉其累加勲仍許回

授周親内外文武官三品以上賜爵一級四品已下各加一階仍並賜勲兩轉見危致命先哲攸貴掩骼埋胔禮經所先雖効用而或殊在惻隱而何間諸道兵士有死王事者各委所在州縣急遽送歸本管官為葬祭其有因戰陣殺戮及捕獲伏辜暴骨原野者亦委所在逐近便收葬應緣流貶及犯罪未葬者並許其家各據本官品以禮收葬自頃軍旅所給賦役繁興吏因為奸人不堪命咨嗟怨苦道路無聊汙可小康與之休息其墊

陌及稅間架竹木茶漆榷鐵等諸色名目悉宜停罷京畿之內屬此寇戎攻劫焚燒靡有寧室王師仰給人以重勞特宜減放今年夏稅之半朕以凶醜犯闕遽用于征爰度近郊息駕茲邑供儲克辦師旅攸寧式當褒旌以志吾過其奉天宜昇為赤縣百姓並給復五年尚德者教化之所先求賢者邦家之大本永言茲道夢想勞懷而澆薄之風趨競不息幽棲之士寂寞無聞蓋誠所未孚故求之不至天下有隱居行義才德高遠晦迹丘

園不求聞達者委所在長吏具名聞奏當備禮邀至諸
色人中有賢良方正直言極諫及博通墳典達於教化
并識洞韜畧堪任將帥者委常參官及所在長吏聞薦
天下孤老鰥寡孀獨不能自活者並委州縣長吏量事
優恤其有年九十以上者刺史縣令就門存問義夫節
婦孝子順孫旌表門閭終身勿事大兵之後內外耗竭
貶食省用宜自朕躬朕當裁乘輿之服御絕宮室之華
飾率已師儉為天下先諸道貢獻非供宗廟軍國之用

一切並停內外官有冗員及百司不急之費委中書
門下即商議條件停減奏聞布澤行賞抑惟舊章今以
餘孽未平帑藏空竭有垂慶賜深愧於懷敕書有所未
該者所司類例條件聞奏

德宗改元大赦天下制文

陸贄

門下王者體元立極欽若乎天地纂業承統嚴奉乎祖
宗所以敬事修誠務本敦孝尊其上以御於下謹其身
而訓於人百神允諧兆庶永賴立國之本斯其大經朕

燭理不明違道招損往遭大難淪陷國都天地宗祧曠
而莫主是則欽若嚴承之義缺矣朕甚懼焉洎再復京
師遽將告謝有司以人力耗斁禮物廢墜日居月諸歲
聿云暮卜其近日俯在上春齊心永懷坐以待曙而百
辟卿士抗疏上言咸謂人心未寧不足以盡敬冠孽猶
在不足以造功迫於羣情俯仰誠願郊廟孔邇瞻言莫
定悼心慙顏胡寧自處重以和平未洽災沴荐臻去歲
旱蝗兩河為甚人流不息師出靡居加之以徵求因之

以荒饑困窮餒殍轉死丘墟而又關輔之間冬無積雪
土膏未發宿麥不滋詳思咎徵有為而致豈兵戎之後
餘梗尚存將獄犴之中深冤未釋又河左淮右逆將阻
兵汙脅齊人陷之死地雖欲自雪厥路無由抱義銜冤
足傷和氣此皆由朕爽德播災於人為之父母實用愧
恥今玄陰已謝春日載陽勾萌畢伸幽執咸震思與海
內同心日新發號更元用符天意宜改興元二年為貞
元元年自正月一日昧爽已前大辟罪已下已發覺未

發覺已結正未結正繫囚見徒罪無輕重咸赦除之應
在河中脅從將士多是奉天赴難功臣本居朔陞夙尚
忠節豈以一夫誑誤棄其累代勲庸朕於此軍尤所不
忍持宜洗滌待以初誠自非與官軍決戰死於鋒刃其
餘雖臨戰擒獲亦並釋放如舍逆歸順者在身先有官
爵實封一切如舊仍準前後制勅所在便給賞錢並與
甄叙如有因危効節建立殊庸量其事蹟特加獎擢李
懷光若能翻然悔過束身赴闕念其常有大勲必當終

始全護仍準前勅授之官封朕於功臣庶亦無負淮西
將吏百姓等有被刼制久為匪人詢事原情諒非獲已
今王師四合計日誅夷玉石同焚用增惻憫宜令諸道
進軍之日唯罪首惡一人自餘徒黨悉從原宥如有歸
明及立功者並準河中將士例褒獎為國之要在於審
官共理分憂守宰彌切闔境性命繫乎其人將使閭里
無愁苦之聲風俗興廉讓之教得不慎簡髦彥寄之化
源自今已後諸州刺史有闕中書門下與朝官中精擇

有理人才者受之如刺史縣令在任頻年課績尤異者
擇授給舍郎中御史中外迭處用觀其能賞罰必行期
於競勸自頃選曹署吏唯以書判求人務騁浮華莫詢
實行且能言者不必適用蘊用者或未能言為官擇人
其在精覈宜令清資常參官每年於吏部選人中各舉
所知一人堪任縣令錄事參軍者所司依資叙註擬便
於甲歷之內具標舉主名銜仍牒報御史臺如到任後
政理尤異及有贓犯事蹟明著者所司錄舉官姓名聞

奏以為褒貶其內外官員及京城諸使名目委御史審勘會商量并省停減仍集百寮定議務從簡約息費使人其京官外官職田及利息官錢等或黠吏詆欺移易疆畔或貧人從徙捕繫親隣日月滋深耗弊彌甚亦令百寮議其折衷擇善而行往以賦役殷繁人不堪命定為兩稅事頗易從比屬兵興或踰始制法無所守吏益為姦哀我勞人汙可小息其諸州府除兩稅外應有權宜科率差役一切悉停京畿及側近州縣所欠百姓科

市和糴價直委度支郎勘會支給諸道非臨寇賊州縣
自去冬已來新點召官健子弟等並宜放散任營生業
應經陷賊州縣百姓屋宇被焚毀并貧病老弱及遭傷
損之類所在量加優恤使得安存天下名山大川并自
古聖帝明王賢臣烈士祠廟墳墓各委當處長吏擇日
致祭必資精潔以達至誠班爵有差所以叙賢也廩秩
有等所以明勸也今或高卑失次中外相踰至於卿士
之家尚羅凍餒之患忠信重祿豈其然耶内外官祿及

俸錢手力雜給等委中書門下與度支郎參詳定額聞
奏應赴奉天及守城將士等並功存社稷節著艱危中
心藏之豈忘酬報頃緣府藏空竭賞給未周乃眷勲臣
實用增愧應準元勅合請賞錢人等委所司節減宮內
及百司費用據所支財物速與給付應在京城及諸道
立功將士等先有詔旨並許甄昇所司勘會淹歷時月
委中書門下即與處分諸軍行營并河中朝邑被脅從
將士家口在京及諸州府者宜令本道節度觀察使常

存賑恤各令優給應諸軍諸使立仗見在城將士等共
賜物七萬疋

文武孝德皇帝冊尊號赦文

元稹

門下昔我高祖太宗化隋為唐奄宅區夏包舉四海全
付子孫其何事哉彼昏盈而我勞敬也明皇承之能大
其業六戎八蠻罔不貢奉由是庶尹弛政庶吏弛刑視
人不勤視神不謹燕寇勃起洞無藩籬六十有七年兵
革大熾其何事哉據逸安而易萌漸也逮我聖父勤身

披攘斬斷誅除天下畧定曾是幽冀賜予懷來荷賴景
靈丕訓不墜環歲之內方外平寧粵予何功時帝之力而
卿大夫猥以大號加於眇身讓於四三益甚其請皇太
后如聞其事歡然慰心慈旨下臨臣誠上迫祇受大禮
漂乎余懷尚念昔者七十二君莫不升中慶成自以為
堯舜莫已若也然而不為堯舜之行者來代無傳焉朕
嘗推是為心不欲名浮於實今卿大夫謂我為文武孝
德矣其將何道以匡予予其業業兢兢日慎一日慕陶

堯虞舜之行以自勉思文祖憲考之道以自勤予苟不思無忘納誨於戲溢美之名既不克讓及物之澤夫何愛焉可大赦天下

宋神宗立皇太子赦文

父子一體也唯立長可以圖萬世之安國家大器也維建儲可以係四海之望位序蚤定而人莫不以為悅典禮亟崇而衆罔敢以為私永惟上嗣之賢實有妙齡之譽入而視膳孝友見於夙成出則好書聽哲錄於自得

粵紹休於正統猶虛位於東朝迺考著龜之占迺稽方冊之寶載涓吉日肇闢青宮周家先親不敢忘廟社之重夏后與子蓋以順天人之心宜卑曠恩徧暨羣品可大赦天下於戲離明震長綿帝緒於億年解吉渙亨灑天仁於萬物蓋禮之所行者大則澤之所流者深咨爾多方體朕至意

德音文

神宗因蝗蟲避正殿降免囚徒德音文

夫人事失於下則天變形於上咎徵之作必有由然自去歲已來災沴仍集雨澤不降延歷三時蟲蝗既臻彌亘千里穀糴翔貴稼穡卒瘁嗷嗷烝人聚泣田畝興言及此實所痛傷徧祈百神曾不獲應方悟禱祀非救患之術言詞非謝譴之誠憂心如焚深自刻責得非刑法外謬忠良鬱堙暴賦未蠲勞師靡息事或無益而重為煩費任或非當而橫肆侵蝕有一於茲足傷和氣本其所以罪實在予百姓何辜重罹殍餒所宜出次貶食節

用緩刑側身增修以謹天戒朕避正殿不御百寮奏事
並於延英處分尚食進膳宜更節減百司不急之務一
切且除諸軍將士外自餘應食官糧人及諸色用度等
並委本司長官商量權行停減以救荒饉仍限十日內
具元額及所釐革條件聞奏待至豐稔却令依舊畿內
百姓委京兆尹切加慰撫除正稅正役外徵科差遣並
宜禁絕非交相侵奪尋常訴訟不須追擾務且息人京
畿內外及京兆府諸縣見禁囚徒死罪降從流以下一

切放免畿內及河中同州界應有因戰陣殺傷遺骸暴
露者各委所在長吏隨事埋瘞咨爾卿佐實維股肱所
當一其誠心同卹災患勉修厥職副我憂勤

神宗戒勵風俗德音文

元稹

勅朕聞昔者卿大夫相與讓於朝士庶人相與讓於齒
周成王刑措不用漢文帝恥言人過真理古也朕甚慕
焉中代以還爭端斯起掩抑其言則專蔽誘掖其說則
欺誣自非責實循名不能彰善癉惡故孝宣必有敢告

乃下光武不以詭辭遽行語稱訕上之非律有匿名之
禁皆所以防三至之毀重兩造之明是以爵人於朝則
皆勸刑人於市則皆懼罪有歸而賞有事也末俗偷巧
內在剛卿大夫無進思盡忠之誠多退有後言之謗
士庶人無切磋琢磨之益多銷鑠浸潤之讒進則諛言
諂笑以相求退則羣居狎處以相識留中不出之請益
發其陰私公論不容之詞實生於朋黨擢一官則曰恩
皆自我黜一職則曰事出他門比周之跡已彰尚矜介

特由徑之蹤盡露自謂貞方居省寺者不能以勤恪蒞
官而曰務求簡易提紀綱者不能以準繩檢下而曰密
奏風聞獻章疏者更相是非備顧問者互有憎愛苟非
秦鏡照膽堯羊觸邪時君聽之安可不惑參斷一謬俗
化益訛禍發齒牙言生枝葉率是道也朕甚憫焉我國
家貞觀開元同符三代風俗歸厚禮讓並行兵興以來
人散久矣姑欲導之以德不欲毆之以刑然而信或未
孚理有未至曾無恥格益用彫剝小則綜覈之權見侵

於下輩大則機密之重旁撓於薄徒尚念因而化之亦
既去其尤者而宰臣等懼其寢染未克澄清備引祖宗
之書願垂戒勵之詔遂申教告頗用殷勤各當自省厥
躬與我同底於道凡百多士宜體朕懷

文章辨體彙選卷三十

欽定四庫全書

文章辨體彙選卷三十一

明 賀復徵 編

諭祭文

發引文附

徐師曾曰按諭祭文者天子遣使下祭之詞也或施諸宗室妃嬪以明親親或施諸勲臣大臣以明賢賢而示君臣始終之義自古及今皆用之蓋王言之一體也

隋文帝祭薛濬文

皇帝咨故考功侍郎薛濬於戲維爾操履貞和器業詳敏允膺列宿勤蹇克彰及攝私艱奄從毀滅嘉爾誠孝感於朕懷奠醑有加抑維朝典故遣使人指申往命覓而有靈歆茲榮渥於戲哀哉

唐憲宗祭故贈婕妤孟氏文

白居易

維元和二年歲次丁亥十二月甲寅朔十九日壬申皇帝遣某官某以庶羞之奠致祭於故婕妤之靈曰惟爾

和順積中柔明奉上動靜合肅雍之體進退得婉孌之
儀選自良家備茲內職修令顏以顧德蘭幽有香守明
節而保身玉潔無玷方資懿範以茂嘉猷彼美有聞於
何不淑遽茲淪逝深用惻傷既卜日晨爰申奠醑以爾
有班氏之明智故贈以婕妤以爾有宓妃之姿容故葬
於洛浦魂兮不昧歆此誠懷尚饗

憲宗祭咸安公主文

白居易

維元和三年歲次戊子三月癸未某日皇帝遣某官某

以庶羞之奠致祭於故咸安大長公主觀瀾毗伽可敦
之靈曰惟姑柔明立性溫惠保身靜修德容動中規度
組練之訓既習於公宮湯沐之封遂開於國邑及禮從
出降義重和親承渥澤於三朝播芳猷於九姓遠修好
信既申協比之姻殊裕保和實賴肅雍之德方憑福履
以茂輝榮宜降永年遽歸長夜故鄉不返烏孫之曲空
傳歸路雖遙青塚之魂可復遠陳薄酌庶鑒悲懷嗚呼
尚饗

憲宗祭吳少誠文 白居易

維元和五年歲次庚寅二月辛未朔二日壬申皇帝遣
內侍省內府局丞賜緋魚袋孫士玫以清酌庶羞之奠
致祭於故彰義軍節度使贈司徒吳少誠之靈曰惟爾
武毅挺質韜鈴奮身負勇果之雄材蓄變通之明識自
察廉列郡節制成師貞且有為勤而不擾軍戎戢睦封
域底寧從義而致誠仗順而保福既延寵渥方茂輝榮
遽此幽淪深用傷悼逝波不捨去日苦多想松楸以軫

懷聞鼓鼙而興歎恩加遣奠禮舉褒崇念爾有靈知予
此意尚饗

穆宗祭回鶻可汗文

白居易

維長慶元年歲次辛丑月日皇帝遣使朝議大夫檢校
右散騎常侍兼少府監御史大夫雲騎尉賜紫金魚袋
裴通致祭於故愛登羅汨沒密施毗伽保義可汗之靈
粵以英武之資雄奇之策撫有九姓制臨一方氣吞諸
戎名播上國况能嚮風納款繼好息人代為親鄰歲入

職貢方賴威畧共清寰瀛倚為長城永固中夏而天殲
驕子國喪名王奪氣色於陰山實精光於昴宿凶訃云
至悲懷用深故遣使臣往將國命展弔奠之禮申哀榮
之恩猶有明靈當鑒誠意尚饗

宋仁宗祭故秦晉國夫人文

宋歐陽修

維靈蔚有令儀著於茂則顧追褒之寵數已極榮念永
閔之佳城載深惻怛列茲奠禮用慰瑩魂

仁宗祭故贈濮王允讓十月九日折櫬文

歐陽

修

維靈日月維吉山川既佳啓茲櫜塗往即襄事顧歆薄奠宜體哀悰

哲宗祭皇叔故魏王下事祭文

蘇軾

維靈出就外邸二年於茲一日不見企予望思矧此告終月逝日遠雖云近郊寧復旋返築室祠宮既固既定雖非永歸亦可少安嗚呼哀哉

哲宗祭故贈太師溫國公司馬光安葬文

蘇軾

軾

嗚呼元豐之末天步維艱社稷之衛中外所屬惟是一
老屏予一人措國於泰山之安下令於流水之源歲月
未周紀綱畧定天若相之又復奪之殄瘁不衰古今所
共知之者神考用之者聖母馴致其道太平可期長為
宗臣以表後世往奠其葵庶知予懷

明武宗皇帝祭閣老靳貴文

朕在東宮先生教之朕登大寶先生輔之今朕南巡先

生逝矣嗚呼哀哉尚饗

發引文

北京為神宗靈駕發引告祭文

宋晁補之

碓露朝晞歎九齡之夢闋宮車晏出驚七月之期臻崩
天增杞國之思考器切堯人之慕因山克就同軌俱來
美塙痛劇於中宸弓劍哀纏於羣辟安知帝所逍遙廣
樂之觀空有人間惆悵汾河之詠戒塗碓輦接軫大伍
竊守提封是虔告享風雲改色羽衛無暉背通汴之神

臯指清伊之吉壤惟宗祧傳聖謳歌訟獄以咸歸而功
德在人禮樂政刑之未悖不顯亦世無疆惟休臣等祇
奉官箴阻瞻牆翬攀號莫逮洒血推心

禮部為欽慈皇后發引百官告祭文

晁補之

媯為舜氏本明德之方興陳以滿封實故家之始人豈
特活千人而有祚固當流八世而莫京允屬盛期篤生
碩媛葛之為綌儉可化於女工鷄則匪蠅庶無憎於朝
事是用膺天眷命開國慶基肇烏至之裡郊肆龍飛之

澤寓而不逮東朝之養已駕仙馭之遙抱泣珠襦初啓
南阡之宅申哀寶冊載嚴西寢之封邈永裕之真游霑
欽慈之徽號雲章五字忍聞追遠之聲風動萬人咸識
因親之化將以貽休有燎垂佑無疆臣等陳列官聯羞
誠祖奠攀輜莫駐摧隕何堪

皇太后靈駕發引祭文

陸游

風御上賓玉衣永閔生堯鉤弋尚懷帝武之祥從禹會
稽遽奉寢園之卜母慈罔極坤載無疆方同軌之畢來

悵東朝之已遠然而艱難契濶歸慰聖主問安之誠壽
考康寧躬享先后莫致之福陰功陽德上際下蟠歷遂
古而罕聞知聖心之無憾臣藩維有守愴慕徒深目斷
栢城神馳翬御敢修饋奠之禮少致攀號之心

文章辨體彙選卷三十一